


焦氏易林

師 需 屯 乾
比 訟 蒙 坤

臺灣國家圖書館, NATIONAL CENTRAL LIBRARY, TAIWAN, R.O.C.



書名 易林注 第一卷 冊共捌冊

刊寫時代 鈔汲古閣影寫元槧大字本

裝式 蝶裝黃綾皮

卷數 序第壹第貳

葉數 壹百伍拾伍葉

行格 半葉捌行行拾伍字

高廣 高伍寸廣陸寸捌分

邊口 左右雙線白口上魚尾下標卷數下魚尾上標葉數

印章 首尾有本館朱文長印

其他標識及狀況 每卦無註者低兩格標無註

覆查加注

中華民國十三年叁月貳拾陸日

檢查者 譚新嘉
覆查者 饒汝信

臺灣國家圖書館, NATIONAL LIBRARY, TAIWAN, R.O.C.

焦氏易林序

東萊人費直字長翁

六十四卦變者占王莽時建信天水焦延壽之撰也夫易者廣矣大矣以言乎遠則不禦以言乎邇則靜而正以言乎天地之間則備矣然易者謂六十四卦也推此言之則繇文說卦之所未盡也故連山歸藏周易皆異辭而共卦雖三

易林序

家並行猶舉一隅耳贛善於陰陽復造此以致易未見者其射存亡吉凶遇其事類則多中至於糜碎小事非其事類則亦否矣贛云通達隱幾聖人之一隅也延壽獨得隱士之說後漢書京房傳云房明治易事梁人焦延壽字贛貧少以好學得幸梁王王供其資令掾意學既成爲郡吏察舉補小黃令以伺

候先知奸邪盜賊不得發愛養吏民化
行縣中舉最當遷三老官屬上書願留
贛有詔許增秩留卒於小黃令贛嘗曰
得我道以亡身者京生也其說長於災
變分六十四卦更直日用事以風雨寒
溫爲候各有占驗房用之尤精孟康曰
分卦直日法一爻主一日六十卦爲三
百六十日餘四卦震離兌坎爲方伯監
司之官所以用震離兌坎者是二至二
分用事之日又是四時各專主之氣各
卦上一日其占法各以其日觀善惡也

漢焦小黃周易變卦筮敘

靈越五雲谿王俞

大凡在變化象數之中者莫逃乎易唯
人之情僞寂白難知繫稱卜筮尚占憂
患興慮彼山上有火明入地中周孔之

情繇是觀變自三古以降雜說歧分矧
卜筮多門亡羊殆盡雖京郭中竒然皆
不免其身夫自知知人乃曰明哲則隗
炤易數於龔使焦贛發誠於君明炤既
沒不顯其占贛明且哲乃留其術俞巖
耕東鄙自前困蒙客有枉駕蓬廬以焦
辭數軸相示俞嘗讀班史列傳及歷代
名儒系譜諸家雜說之文咸稱自夫子
授易於商瞿僅逾十輩延壽傳經於孟
喜固是同時當西漢元成之間凌夷厥
政先生乃或出或處外比苞蒙輒以易
道上干梁王遂爲郡察舉詔補小黃令
而邑中隱伏之事皆預知其情得以尤
異當遷尋亦卒於官次所著大易通變
其卦摠四千九十六題事本彌綸同歸
簡易其辭假出於經史其意雅合於神

祇但率潔精專事無不中而言近意遠
易識難詳不可瀆蒙以為辭費後之好
事如君山者則子雲之書為不朽矣以
聖唐會昌景寅歲周正五日敘

焦林直日

六十卦每卦直六日共直三百六十
日餘四卦各寄直一日

立春 雨水 三十日五卦

小過 蒙 益 漸 泰

驚蟄 春分 春分震卦

需 隨 晉 解 大壯

清明 穀雨

豫 訟 蠱 革 夬

立夏 小滿

旅 師 比 小畜 乾

芒種 夏至 夏至離卦

大有 家人 井 咸 姤

小暑 大暑

鼎 豐 渙 履 遯

立秋 處暑

恒 節 同人 損 否

白露 秋分 直秋分 晷卦

巽 萃 大畜 賁 觀

寒露 霜降

歸妹 無妄 明夷 困 剝

立冬 小雪

艮 既濟 噬嗑 大過 坤

大雪 冬至 直冬至 坎卦

未濟 蹇 頤 中孚 復

從大雪後四十五日將坎卦入數漸從立

小寒 大寒

屯 謙 睽 升 臨

每兩節氣共三十日管五卦逐日終而
復始排定一卦相次管六日凡卜看本
日得何卦便於本日卦內尋所卜得卦
看凶吉

易林卷第一

三三 輶上 輶下



道陟石阪胡言連蹇譁瘖且聾莫使
道通請謁不行求事無功

陟升也連按禮韻讀上聲傲慢不
前之貌蹇難也譁傳言通夷夏之
言轉告之也

之坤

招禍來螫害我邦國病在手足不得
安息

無註

屯

陽孤亢極多所恨惑車傾盖亡身常
憂惶乃得其願雌雄相從

陽孤亢極易乾卦上九亢龍有悔

蒙

鵠鵠鳩鳩專一無尤君子是則長受
嘉福

鵠鵠即布穀鳥也

需

目潤足動喜如其願舉家蒙寵

潤目動貌漢書眼潤得酒肉

訟

龍馬上山絕無水泉喉嚨唇乾舌不

能言

無註

師

倉盈庾億宜稼黍稷國家富有民人

蕃息

無註

比

中夜狗吠盜在墻外神明祐助銷散

皆去

無註

小畜

据斗運樞順天無憂與樂並居

無註

履

空拳握手倒地更起富饒豐衍快樂

無已

無註

泰

不風不雨白日皎皎宜出驅馳通利

大道

無註

否

戴日精光驟駕六龍祿命徹天封為

燕王

無註

同人

子號索哺母行求食反見空巢誓我
長息

無註

大有

上帝之生福祐日成修德行惠樂安
且寧

無註

謙

山險難登澗中多石車馳轉擊載重
傷軸僭負善躓跌踈右足

無註

豫

禹鑿龍門通利水源東注滄海民得
安存

龍門按書禹貢屬雍州在今馮翊
夏陽縣以下皆言禹治水之功

隨

乘龍上天兩蛇為輔踊躍雲中遊觀
滄海安樂長處

無註

蠱

彭祖九子據得不殆南山松栢長受

嘉福

彭祖堯時人好和滋味進雉羹于
堯堯享之而錫以壽考至八伯歲
九子未詳詩云如南山之壽

臨

南山昊天刺政關身疾悲無辜背憎
為仇

詩小雅節南山云節彼南山又曰

不弔昊天又曰昊天不平此詩家
父所作刺周王用尹氏為太師秉
國之均不能毗輔天子用威虐政
以召禍亂民所憎惡甚於仇讐也

觀

江河淮海天之奧府眾利所聚可以
饒有樂我君子百福是受

無註

啞嗑

堅冰黃鳥啼哀悲愁不見甘粒但觀
藜蒿數驚鷺鳥為我心憂

無註

賁

室如懸磬既危且殆蚤見之士依山
處谷

室如懸磬出左傳僖公二十六年

註云如而也野物未成故言居室而資糧縣盡也

剝

大禹式路蚩尤除道周匝萬里不危不殆見其所使無所不在

大禹夏禹姒姓蚩尤軒轅時人

復

三人為旅俱歸北海入門昇堂拜謁

王母勞賜我酒

周穆王宴王母于瑤池 又漢武

內傳西王母以七月七日降帝命

侍女索桃須臾以玉盤盛桃七枚

大如鴨卵形圓色青以呈王母母

以五枚與帝

無妄

傳言相誤非干徑路鳴鼓逐狐不知

迹處

無註

大畜

三羊爭雌相逐奔馳終日不食精氣
勞疲

無註

頤

純服黃裳戴上與與德義以生天下

歸仁

純服色不雜也易坤卦六五黃裳
元吉文在中也

大過

桀跖並處人民勞苦雍兵荷糧戰於
齊魯

桀夏桀跖盜跖

離

胎生孚乳長息成就充滿帝室家國
昌富

無註

坎

黃鳥采葦既嫁不吝念我父兄思復
邦國

詩小雅黃鳥篇黃鳥黃鳥無啄我
粟此邦之人不我肯穀言旋言歸
復我邦族

咸

三人求橘反得丹穴女貴以富黃金
百鎰

註未詳

恒

東山西岳會合俱食百家送從以成
恩福

無註

遯

弱雞無距與鵠交鬪翅折目盲為鳩
所傷

無註

大壯

隙大墻壞蠹衆木折狼虎為政天降
罪罰高弒望夷胡亥以斃

秦二世無道丞相趙高專權弒二
世于望夷宮胡亥二世名

晉

三癡俱走迷路失道或不知歸反入
患口

註未詳

明夷

弓矢俱張弮彈折弦丸發不至道遇

害患

無註

家人

三女求夫伺候山隅不見復關長思
歎憂

詩玼篇刺淫泆也云不見復關泣
涕漣漣復關男子之所居也不敢
顯言其人故託言之耳

睽

陽旱炎炎傷害禾穀穡人無食耕夫
歎息

無註

蹇

騎狔逐羊不見所望經涉虎穴亡羊
失羔一本云亡羝失羊

無註

解

闇昧冥語轉相註誤鬼魅所舍誰知
卧處

無註

損

姬姜祥淑二人偶食論仁議福以安
王室

姬周公旦姜太公望二人同心以
輔周室

益

公孫駕驪載駟東齊延陵說產遺季
紵衣

左傳鄭大夫子產吳公子季札嘗
聘鄭與子產相得子產以紵衣獻
季札

夫

孤竹之墟失婦亡夫傷於蒺藜不見
少妻東郭棠姜武氏以亡

孤竹國名易繇曰困于石據于蒺
藜入于其宮不見其妻凶棠姜齊
棠公之妻東郭偃之姊也武氏崔
武子杼見左傳

遘

仁政不暴鳳凰來舍四時順節民安
其處

無註

萃

任劣力薄駑孱恐怯如狷見鵠不敢
拒格

史記龜策傳云蝟辱於鵠郭璞曰
蝟能制虎見鵠仰地淮南畢萬曰
鵠令蝟反腹者蝟憎其意而心惡

之也

升

衛侯東遊惑於少姬亡我考妣久迷
不來

註未詳

困

噂噂所言莫知我垣歡喜堅固可以
長安

無註

井

鸞鳴岐山龜應幽淵男女構精萬物
化生文王以成為周開庭

鸞鳳類文王之時鳳鳴于岐山大
禹之時龜出于洛水

革

玄黃虺隤行者勞疲役夫憔悴踰時

不歸

詩卷耳篇陟彼高岡我馬玄黃又
曰陟彼崔嵬我馬虺隤又云我僕
痲矣云何吁矣

鼎

弱足則跟不利出門市賈無利折亡
為患

無註

震

懸狃素餐居非其官失輿剥廬休坐
徙居

詩伐檀篇云胡瞻爾庭有縣貆兮
彼君子兮不素餐兮貆貉類號餐當
作餐易剥卦上九君子得輿小人
剥廬

艮

民怯城惡姦人所伏寇賊大至入我
郭郭妻子俘獲

按春秋傳成公九年楚子重自陳
伐莒圍渠丘渠丘城惡楚遂入渠
丘

漸

陽低頭陰仰首水為災傷我足進不
利難生子

無註

歸妹

背北相憎心意不同如火與金
詩十月之交卒章云噂沓背憎註
云多言以相悅背則相憎也

豐

太微帝室黃帝所宜蕃屏周衛不可
得入常安無患

旅
微當作微大微帝座星也

蠶粟犧牲敬享鬼神嗜飲食受福
多孫

按內則祭天地之牛角蠶粟

巽

出門逢惡與禍為怨更相擊刺傷我
手端

無註

兌

鷓飛中退舉事不遂衆人亂潰

春秋僖公十六年正月六鷓退飛
過宋都二十二年十一月宋公及
楚人戰于泓宋師敗績

渙

跛躄相隨日暮牛罷陵遲後旅失利

士雌

無註

節

龍角博預位至公卿世祿久長起動
安寧

古者公卿有功于國家子孫世享
其祿故孟子曰仕者世祿龍角博
預未詳或曰星名

中孚

舜升大禹石夷之野徵詣王庭拜治
水土

書帝曰咨禹汝平水土惟時懋哉
石夷未詳

小過

從風放火荻芝俱死三害集房叔子
中傷

三害未詳

既濟

揆生荆山命制輸班袍衣剥脫夏熱
冬寒飢餓枯槁莫人震憐

荆山多產異材班公輸子魯班也

未濟

長面大鼻來解已憂遺吾福子與我
惠妻惠吾嘉喜

無註

☷☷坤下坤
☷☷坤上坤

不風不雨白日皎皎亘出驅馳通利

大道

無註

之乾

谷風布氣萬物出生萌庶長養華葉
茂成

按詩谷風篇習習谷風以陰以雨
註云東風謂之谷風以其長養萬
物也

屯

蒼龍單獨與石相觸摧折兩角家室
不足

無註

蒙

城上有烏自名破家招呼酖毒為國
患灾

無註

需

霜降閉戶蟄虫隱處不見日月與死
為伍

無註

訟

天之德室溫仁受福衣裳所在凶惡不起

無註

師

皇階九重絕不可登未見王公謂天蓋高

無註

比

孔德如玉出於幽谷升高鼓翼輝光照國

無註

小畜

五輓四軌復得饒有陳力就列騶虞
悅喜

按詩召南騶虞仁獸名白虎黑文不食生物者也

履

四足無角君子所服南征述職以惠我國

無註

泰

雷行相逐無有攸息戰于平陸為夷所覆又云弊筍在梁逸不榮漁父苦連空口乾

按詩敝筍在梁註云敝壞筍罟也梁魚梁詩人以敝筍不能制大魚為比

否

六龍爭極服在下飾謹慎管籥結禁毋出

無註

同人

長男少女相向共語福祿歡喜

無註

大有

奸延惡人使德不通炎火為殃年穀大傷

無註

謙

脩其翰翼隨風向北至虞夏國與舜相得年歲大樂邑無盜賊虞夏舜禹有天下之號也

豫

鉛刀攻玉堅不可得盡我筋力胝踵為疾

無註

隨

舉被覆目不見日月衣衾簞簋就長

夜室

吳夫差羞見子胥爲幘冒乃死

蠱

賊仁傷德天怒不福斬刈宗社失其
邦域

無註

臨

白龍赤虎戰鬪俱怒蚩尤敗走死於

魚口

史記正義曰河圖龍魚云黃帝攝
政有蚩尤兄弟八十一人獸身人
語銅鐵額能作大霧食沙造五兵
威震天下誅殺無道萬民欽命黃
帝行以仁義不能禁止乃仰天而
歎天遣玄女下授黃帝兵符與蚩
尤戰於涿鹿之野遂命殺之此言

魚口未詳

觀

北辰紫宮衣冠立中含和建德常受
天福

北辰北極天之樞也紫宮即紫微

噬嗑

稷為堯使西見王母拜請百福賜我
善子

稷后稷為堯帝臣教民稼穡後至
文武而有天下

賁

三人異趨反覆迷惑一身五心亂無
所得

無註

剝

南山大猱盜我媚妾怯不敢逐退然

獨宿

攫居縛切狙也又曰大猿

復

衆鬼所趨反作大怪九身無頭魂驚
魄去不可以居

未詳

無妄

延頸遠望眯為目疾不見叔姬使伯

心憂

無註

大畜

典策法書藏在蘭臺雖遭亂潰獨不
遇災

漢官儀御史臺內掌蘭臺秘書

頤

自衛反魯時不我與冰炭異室仁道

隔塞

孔子周流四方不遇自衛反魯遂
刪詩定書

大過

瘤癭禿疥為身瘡害病疾癘殘常不
遠逮

無註

坎

齊東郭盧嫁我洛都俊良美好媒利
過倍

崇姜齊崇公之妻東郭偃之姊也
離

齊魯爭言戰於龍門構怨連禍三世
不安

按春秋魯成公二年春齊侯伐我
北鄙圍龍頃公之嬖人盧蒲就魁

門焉龍人囚之齊侯親鼓三日取龍

咸

芳澤肥壤農人豐敵利居長安歷世無患

無註

恒

倉盈庾憶宜種黍稷年豐歲熟民得

安息

詩楚茨篇我倉既盈我庾維億

遯

鷓鴣破斧邦人危殆賴其忠德轉禍為福負危復立

鷓鴣破斧皆詩豳風篇名言周公之事誅管蔡以安周室

大壯

歲飢無年虐政害民乾溪驪山秦楚
結寃

昭公十三年楚靈王被弒于乾溪
史記秦始皇造作驪山

晉

樹摯累累締結難解媼母衙嫁媒不
得坐自為身禍

樹摯一作樹摯見蒙之比其義未
詳媼母黃帝次妃貌醜而賢衙當
作衙

明夷

訾陬開門鵲鳴彈冠章甫進用舞韶
和鸞三人翼事國無災患

章甫冠名舞韶樂名和鸞皆鈴也
在軾曰和在鑣曰鸞車馬之飾也
訾陬開門未詳

家人

弟姊合居與類相扶願慕群醜不離
其處

無註

睽

邯鄲反言兄弟生患涉叔憂恨卒死
不還

涉叔即陳涉涉嘗令陳人武臣徇
趙地武臣到邯鄲自立為趙涉怒
捕繫武臣家室後因柱國之諫遂
立武臣為趙王武臣終於背涉竟
死於莊賈之難出陳涉傳

蹇

三人逐兔各爭有得愛亡善走多獲
鹿子

無註

解

北辰紫宮衣冠立中含和建德常受
天福

損
北辰北極天之樞也紫宮即紫微

拜跪請免不得其哺俛首銜枝低頭
北去

無註

益

鶴盜我珠逃於東隅求之郭壻不見
所居

未詳

夬

一簧兩舌妄言謬語三姦成虎曾毋
投杼

一簧者即詩所謂巧言如簧兩舌

言不一也曾母曾參之母人有言
曾參殺人者曾母不信及三人言
之曾母殺杼下機而走

姤

孤獨特處莫與為旅身日勞苦使布
五穀陰陽順序又伯虎仲熊德
又四布

舜舉八元八愷有伯虎仲熊

萃

褰衣涉河澗流浚多賴遇舟子濟脫
無他

無註

升

憑河登山道里阻難求事少便

無註

困

兔置之容不失其恭和謙致樂君子
攸同

按詩傳云雖兔置之野人而其才
之可用

井

三女求夫伺候山隅不見復關泣涕
連如

詩氓之篇云不見復關泣涕連連
復關指男子所居不敢顯名故託
言之此詩刺淫泆也

革

螟蟲為賊害我黍穀中雷空虛家無
所食

螟蟲食苗心者害苗之蟲也中雷
月令云中室也

鼎

望尚阿衡太宰周公藩屏輔弼福祿
來同

望太公呂尚也阿衡伊尹也太宰
官名周公為太宰

震

三年生狗以戌為母荆夷上侵姬伯
出走

注未詳

艮

塗遏道塞求事不得

無註

漸

探懷得蚤無有凶憂所願失道善居
漸好

無註

歸妹

飛樓屬道趾多攬垣居之不安覆壓
爲患

無註

豐

義不勝情以欲自傾幾利危寵折角
摧頸

無註

旅

潼滄蔚蒼林木來會津液下降流潦
霈霈

無註

巽

白駒生芻猗猗盛姝赫啻君子樂以
忘憂

詩白駒篇生芻一束其人如玉

兗

車馳人趨卷甲相仇齊魯寇戰敗於
犬丘

按春秋齊師侵魯戰于長勺車馳
卒奔齊師敗績事見莊公十年春

渙

舉首望城不見子貞使我悔生

無註

節

龍鬪時門失理傷賢內畔外賊則生
禍難

春秋昭公十九年鄭大水龍鬪于
時門之外洧淵國人請為禳焉子
產弗許曰我鬪龍不我覲也龍鬪
我獨何覲焉禳之則彼室也吾無
求於龍龍亦無求於我乃止

中孚

安如太山福喜屢臻雖有豺虎不致
危身

無註

小過

初憂後喜與福為市八佾列陳飲御
嘉友

八佾舞列也古者天子舞八佾

既濟

持刃操肉對酒不食夫行從軍小子
入獄抱膝獨宿

無註

未濟

陰衰老極陽建其德履离戴光天下
昭明功業不長蝦蟆代王

未詳

☵☲
震下屯
坎上屯

兵征大宛北出玉門與胡寇戰平城
道西七日絕糧身幾不全

大宛國名玉門關名 冒頓單于
圍漢高祖於白登七日用陳平秘
計厚遺閼氏說冒頓解圍

之軋

汎汎栢舟流行不休耿耿寤寐心裏
大憂仁不逢時復隱窮居

詩栢舟篇言仁而不遇也汎彼栢
舟亦汎其流耿耿不寐如有隱憂

坤

采薪得麟大命隕顛豪雄爭名天下

四分

未詳

蒙

山崩谷絕天福盡竭涇渭失紀玉歷

既已

涇渭二水名

需

夏臺姜里湯文所厄鬼侯兪賄商王

解舍

夏臺姜里皆獄名湯囚夏臺文王

拘姜里

訟

泥滓汙辱弃捐溝瀆為衆笑哭然不

顯錄

無註

師

李梅冬實國多盜賊擾亂並作君不能息

春秋魯僖公三十三年冬隕霜不殺草李梅實公羊傳曰紀異也此

比 祿去公室政在公子遂之應

疾故 獐鹿逐牧飽歸其居反還次舍無有

無註

小畜

所歡 夾河為婚期至無船搖心失望不見

無註

履

寵光 百足俱行相輔為強三聖翼事王室

三聖堯舜禹也

泰

顛倒 坐立失處不能自居賊破王邑陰陽

無註

否

登几上輦駕駟南遊合從散衡燕齊
以強

蘇秦主從張儀主衡秦事燕儀事
秦按禮部韻毛居正曰以六攻一
為從以一離六為橫合之曰從衡

同人

三孫荷弩無益於輔城弱不守邦君
受討

三孫魯大夫孟孫叔孫季孫也昭
公二十五年九月伐季氏三家反
攻公公遜于齊次于陽州

大有

河伯大呼津不可渡船空無人往來
亦難

謙

援神契云河者水之伯河伯水神

甘露醴泉太平機關仁德感應歲樂

民安

瑞應圖王者德至於天和氣感則
甘露降于松栢六帖云醴泉美泉
也水之精太平則出出則其政和
平堯之時德茂清平則出

豫

重茵厚席循臯采藿雖躡不懼反復
其處猿墮高木不踈手足還歸其室
保我金玉

踈音渦

隨

太一駕騶從天上来徵我叔季封為
魯侯

大乙星名成王封周公之子伯禽
於魯

盪

南巴六安石解戟天所指不已耄老
復丁弊室舊墟更為新家

無註

臨

家給人足頌聲並作四夷賓伏干戈

韜閣

書四夷來賓此言武王偃干戈事

觀

東鄰嫁女為王妃后莊公築館以尊

王母歸于京師季姜說喜

春秋魯莊公元年王姬下嫁於齊

命同姓諸侯主之魯以姬姓故築

館而迎之冬王姬歸于齊桓公

九年春紀季姜歸于京師為桓王
后

噬嗑

陳妻敬仲兆興齊姜營丘是適八世

大昌

按春秋傳陳媯姓敬仲即陳公子
完魯莊公二十二年奔齊使為工
正初懿氏卜妻敬仲曰有媯之後
將育于姜八世之後莫之與京姜
齊姓營丘齊所封之地

賁

路多枳棘步刺我足不利旅客為心
作毒

無註

剝

天宮列宿五神共舍宮闕光堅君安

其居

無註

復

牧羊稻園聞虎呻喧懼畏惕息終無

禍患

無註

無妄

鳴條之圖北奔犬胡左袵為長國號

匈奴主君旄頭立尊單于

樂彥括地譜云夏桀無道湯放之

鳴條三年而死其子暈弼妻桀之

衆妾避居北野隨畜移徙中國謂

之匈奴單于者廣大之貌尊稱之

也

大畜

剋身繫已逢禹巡守錫我玄珪拜受

福祐

書禹貢云禹錫玄圭告厥成功言
水土既平禹以玄圭為贄而告成
功于舜也水色黑故圭以玄云

頤

冬華不食國多盜賊疾病難醫鬼哭
其室

無註

大過

襄送季女至于蕩道齊子旦夕留連
久處

季女齊子齊襄公妹魯桓公夫人
也桓公十八年公與夫人姜氏如
齊詩云魯道有蕩齊子庸止

坎

朽根倒樹花葉落去卒逢火焮隨風

偃仆

焱音焰

離

陰變為陽女化作男治道得通君臣

相承

無註

咸

炎絕續光火滅復明簡易理得以成

卓功

易繫辭易簡而天下之理得矣

恒

多載重負捐棄於野子毋誰子但自

勞苦

無註

遯

江河海澤衆利室宅可以富有飲御

嘉客

無註

大壯

冬採薇蘭地凍堅拆利走室北暮毋
所得

詩小雅採薇篇採薇採薇薇亦作
止曰歸曰歸歲亦莫止

晉

鳥鳴嘻嘻天火將起燔我館屋災及
姬后

按春秋襄公三十年夏五月或叫
于宋太廟曰嘻嘻出出鳥鳴于亳
社如曰嘻嘻甲午宋大災宋伯姬
卒

明夷

蠱室蜂戶螫我手足不可進取為身

害速 一云 萬螫我足蜂螫我手

萬蜂屬螫蟲也萬丑邁切螫音釋

家人

崔嵬北岳天神貴客温人正直主布
恩德開衣不已蒙受大祿

崔嵬高峻貌周禮并州其山鎮曰
恒山唐天文大梁折木其神主於
恒山辰星出焉謂之北嶽

聯

伯蹇叔盲莫為守床失我衣裘伐民
除鄉

無註

蹇

為季求婦家在東海水長無船不見
所權
無註

解

山陵丘墓魂魄室舍精誠盡竭長寢
不覺

無註

損

騎牛折角下山傷軸失其利祿
無註

益

水載舟船無根以浮往來濟濟心勞
且憂

無註

夬

有鳥來飛集于宮樹鳴聲可惡主將
出去

無註

姤

東徙不時觸患離憂井泥無濡思叔
舊居

周易曰井泥不食舊井無禽

萃

黃帝所生宓羲之字兵刃不至利以
居止

宓羲都於陳黃帝有熊國君少典
之子有熊即今河南新鄭是也

升

東山救亂處婦思夫勞我君子役無
休已

東山周公東征之詩處婦思夫詩
曰鸛鳴于垤婦歎于室

困

跛躓未起先利後市不得鹿子
無註

井

大蛇當路使季畏懼湯火之災切近
我膚賴其天幸趨于王廬

漢高祖字季嘗被酒夜徑澤中有
大蛇當道高祖拔劍斬之

震

從容常閑遊戲南山拜祠禱神使神
無患

無註

鼎

區脫康居慕義入朝湛露之權三爵
畢恩後歸野廬與母相扶

區脫與甌脫同土室也胡人侯望
處出匈奴傳康居國名湛露天子
燕諸侯之詩

革

魚鱉列市河海饒有長錢善價商李
悅喜

無註

良

年常蒙慶今歲受福三夫採葩出必
有得

無註

漸

二人俱東道怒爭訟意乖不同使君
怙怙

無註

歸妹

樹我藿豆鹿兔為食君不恤護秋無
收入

無註

豐

黃鳥悲鳴愁不見星因於執鳥鳥鷁使
我驚

無註

旅

雙鳥惧飛欲歸稻食經涉荏澤為矢
所射傷我曾臆

無註

巽

久客無依思歸我鄉雷雨盛溢道未
得通

無註

兌

道路辟除南至東遼衛子善辭使國
無憂

未詳

渙

同枕同袍中年相知少賈無失獨居
愁思

無註

節

衆神集聚相與議語南國虐亂百姓
愁苦興師征討更立賢主

未詳

中孚

北陸閉蟄隱伏不出目盲耳聾道路
不通

左傳古者日在北陸而藏冰註陸
道也謂夏十二月日在虛危冰堅
而藏之

小過

癡狂妄作心狂善惑迷行失路不知
南北

無註

既濟

棟隆強輔寵貴日光福善並作樂以

高明

易太過九四棟隆吉象曰棟隆之

吉不撓于下也

未濟

愛我嬰女牽衣不與冀幸高貴反日

賤下

無註

☵
坎下蒙

何草不黃至未盡玄室家分離悲憂

於心

詩何草不黃刺幽王也四夷交侵

中國背叛君子憂之故作是詩也

曰何草不黃何日不行何人不將

經營四方又云何草不玄何人不
矜哀我征夫獨為匪民

之乾

海為水王聰聖且明百流歸德無有
叛逆常饒優足

書禹貢云江漢朝宗于海註曰猶
諸侯之朝宗于王也

坤

天之所為禍不過家一云左輔右弼
金玉滿堂常盈不亡富如教倉

無註

屯

安息康居異國穹廬非吾習俗使我
心憂

安息康居皆外國名穹廬其室也

需

范公鷓夷善賈飾資東之營丘易字
子皮把珠戴金多得利歸

按史范蠡去越乘舟裝其輕寶珠
王浮海出齊變姓名自號鷓夷子
皮善營產業以致巨富

訟

老楊日衰條多枯枝爵級不進遂下
摧墮

無註

師

小狐渡水汚濡其尾利得無幾與道
合契

狐當作狐易未濟亨小狐汔濟濡
其尾无攸利

比

豕生魚魴鼠舞庭堂奸佞施毒上下

昏荒君失其國

無註

小畜

天地配享六位光明陰陽順敘以成
和平

易乾卦彖曰六位時成

履

蹀躞足傷右足病擁失旅後時利走

不來

無註

泰

異體殊患各有所屬西鄰孤嫗欲寄
我室王母罵詈求不可得

無註

否

操柶鄉畝折貨稷黍飲食充口安利

無咎

無註

同人

所受大喜福祿重来樂且日富蒙慶

得財

無註

大有

舉盃飲酒無益温寒指直失取亡利

不歡

無註

謙

日月相望光明盛昌三聖茂承功德

大隆

三聖堯舜禹也

豫

猾夫爭強民去其鄉公孫叔子戰於

蕭湘

未詳

隨

援墮高木不踈手足還歸其室保我
金玉

踈音渦

蠱

逐狐東山水逼我前深不可涉失利
後便

無註

臨

鑿井求玉非卞氏寶名因身辱勞無
所得

因當作困卞和獻玉璞於楚懷王

觀

黃玉温厚君子所服甘露溽暑萬物

生茂

財貨源云玉天地之精也黃中正色君子在位之稱又瑞應圖王者德至於天和氣感則甘露降于松栢

噬嗑

畫龍頭頸文章不成甘言善語說辭無名

無註

賁

招禍致凶來弊我邦病在手足不得安息

無註

剝

復位乘勢靡有絕斃皆為隸圉與衆庶位

復
齊人有言曰雖有智慧不如乘勢

獐鹿雉兔群聚東園廬黃白脊俱往
趨逐九齮十得君子有喜
齮仕革切齧也

無妄
織錦未成緯盡無名長子逐兔鹿起
失路後利不得因無所據

無註

大畜

天厭周德命與仁國以禮靜民兵革
休息

無註

頤

重譯賀芝來除我憂善說遂良與喜
相求

漢武帝元封元年甘泉宮產芝九莖連葉乃作芝房之歌以薦郊廟也

大過

膏壤肥澤人民孔樂宜利居止長安富貴

無註

坎

白龍黑虎起鬚暴怒戰於涿鹿蚩尤敗走居止不殆君安其所

正義曰河圖龍魚云黃帝攝政有蚩尤兄弟八十一人獸身人語銅鐵額能作大霧食沙造五兵威震天下誅殺無道萬民欽命黃帝行以仁義不能禁止乃仰天而歎天遣玄女下授黃帝兵符與蚩尤戰

離
於涿鹿之野遂禽殺之

離

抱關傳語聳跛摧殆衆賤無下灾殃

所在

無註

咸

憂禍解除喜至慶來坐立歡門與樂

爲鄰

無註

恒

折鋒戴父輦馬放休行軍依營天下

安寧

無註

遁

至德之君仁政且溫伊呂股肱國富

民安

湯舉伊尹文王舉呂望相與輔治
以安天下

大壯

千里望城不見山青老兔蝦蟆遠絕
無家

老兔月中玉兔蝦蟆月中蟾蜍

晉

有莘季女爲夏妃后貴夫壽子母字

四海

按本紀鯀取有莘氏女謂之女志
是生高密宋衷云高密禹所封之
國

明夷

不虞之患禍至無門奄忽暴卒痛傷
我心

無註

家人

飛鷹退去不食鄰鳥憂患解除主君安
安居

無註

睽

蹉差側跌申酉爲祟亥戌滅明顏子
隱藏

未詳

蹇

司祿憑怒謀議無道商氏失政殷人
乏祀

商紂無道武王伐之封紂子武庚
命三叔監殷武王崩成王立三監
以武庚叛周公東征討之遂乏祀
焉

解

望雞得雉真馬獲駒大德生少有瘳
從居

無註

損

怵怵怛怛如將不活黍稷之恩靈輒
以存

左傳晉靈公不君趙盾諫公患之
飲盾酒伏甲將攻之初盾田舍于
翳桑見靈輒病不食三日盾食之
爲簞食而與之既而與爲公介倒
戟以禦公徒而免之問何故對曰
翳桑之餓人也不告名而退

益

莫莫輯輯夜作晝匿謀議我資求攻
我室空盡以財幾無以食

無註

夫

天之所壞不可強支衆口指笑雖貴必危

無註

姤

目動睫睨喜來加身舉家蒙歡吉利無殃

睨目動貌漢書眼睨得酒肉

萃

寵羹芬薌染指弗嘗口飢於手子公恨饒

楚人獻鼈於鄭靈公子公食指動以示子家曰他日我如此必嘗異味宰夫解鼈而笑公問之子家以告召子公而弗與子公怒染指於鼎嘗之出春秋傳

升

天福所豐兆如飛龍成子得志六二
以興

困

陳成子得政於齊乃敬仲八世孫
氓伯易絲抱布自媒弃禮急情卒離
悔憂

詩氓之篇云抱布貿絲匪來貿絲
來即我謀

井

三人為旅俱歸北海入門上堂拜謁
王母勞賜我酒歡樂無疆

無註

革

愆淫旱疾傷害稼穡喪制病來農人
無食

無註

鼎

攫飯把肉以就口食萬往必得無有

虛乏

無註

震

夏姬親附心聽悅喜利以搏取無言不許

左傳成公七年夏姬鄭穆公女陳大夫御叔妻巫臣嘗止子反取夏姬

艮

南山昊天刺政閔身疾悲無辜背憎為仇

詩小雅節南山云節彼南山又曰不弔昊天又曰昊天不平此詩家

父所作刺周王用尹氏爲太師秉國之均不能毗輔天子用威虐政以召禍亂民所憎惡甚於仇讐也

漸

鳥飛無翼兔走折足雖欲會同未得所欲

無註

歸妹

體重飛難未能踰關不離室垣

無註

豐

四雄並處人民愁苦擁兵西東不得安所

無註

旅

重驛關牢求解已憂心惑乃成與喜

俱居

無註

巽

患解憂除皇母相於與喜俱來使我
安居

無註

兌

冬生不華老女無家霜冷蓬室更爲

枯株

無註

渙

震慄恐懼多所畏惡行道留難不可
以步

無註

節

三人共妻莫適爲雌子無名氏公不

可知

無註

中孚

草彫被霜花葉不長非時爲落家受
其殃

無註

小過

雉兔之東狼虎所從貪叨凶惡不可

止息

無註

既濟

馬驚車破主墮深溝身死魂去離其

室廬

無註

未濟

山林麓藪非人所處鳥獸無禮使我

心苦

無註

易林卷第一

臺灣國家圖書館, NATIONAL CENTRAL LIBRARY, TAIWAN, R.O.C.

易林卷第二

三三 坎上 需

久旱三年草木不生
粢盛空乏無以
供靈

說文粢盛黍稷在器中以祀者也
之乾

火滅復息君明其德
仁人可遇身受
利福

無註

坤

溫山松栢常茂不落
鸞鳳以庇得其
歡樂

無註

屯

西誅不復恃強
負力倍道趨敵
師徒
敗覆

按史記楚項梁西擊秦破章邯引
兵至定陶再破秦軍項羽沛公大
破秦兵於雍斬李由梁益輕秦有
驕色宋義諫弗聽秦悉起兵益章
邯擊楚軍大破之定陶項梁死焉
蒙

三塗五嶽陽城太室神明所伏獨無
兵革

三塗山名在河南伊闕縣陽城山
谷名在嵩山下太室山名

訟

二牛生狗以戌爲母荆夷上侵姬伯
出走

二牛一作三年一作三馬生駒見
否之姤

師

覓遊江海役行千里以爲死亡復見
空素長主凶憂

無註

比

太一駕騶從天上求徵召叔季封爲
魯侯無有凶憂

太乙星名成王封周公之子伯禽
於魯

小畜

絳績獨居寡處無夫陰陽失志爲人
僕使

無註

履

兵征大宛北出玉門與胡寇戰平城
道西七日絕糧身幾不全

大宛國名玉門關名 冒頓單于

圍漢高祖於白登七日用陳平秘
計厚遺閼氏說冒頓解圍

秦

楚靈暴虐罷極民力禍起軋谿弃疾
作毒扶伏奔逃死申亥室

楚靈王汰侈已甚成章華之臺至
狩于州來次于軋谿公子比作亂
遂縊于芋尹申亥氏

否

雌單獨居歸其本巢毛羽憔悴志如
死灰

無註

同人

兩矛相刺勇力鈞敵交綏結和不破
不缺

無註

大有

乘船渡濟載水逢火賴幸免患蒙我
生全

無註

謙

喪寵溢尤政傾家覆我宗失國秦滅
周室

無註

豫

冬無葺冰春陽不通陰流為賊國被
其殃

無註

隨

田鼠野雞意常欲逃拘制籠檻不得
動搖

無註

盤

佩玉藥兮無所繫之旨酒一盛莫與
笑語孤寡獨特常愁憂苦

無註

臨

沒遊原口求鮫爲寶家危自懼復出
生道

無註

觀

河水孔穴壞敗我室水深無岸魚鱉
傾側

無註

噬嗑

教羊牧兔使魚相捕任非其人費日
無功

無註

賁

升户入室就温燠食水凍北陸不能相賊

無註

剝

孤竹之墟老婦無夫傷於蒺藜不見少妻東郭崇姜武氏破亡

孤竹國名易繇曰困于石據于蒺藜入于其宮不見其妻凶崇姜齊崇公之妻東郭偃之姊也武氏崔武子杼見左傳

復

凶憂災殃日益明章福不可整厘三郤瘵傷

按春秋三郤晉大夫郤錡郤犇郤至成公十七年晉厲公侈多外嬖

欲盡去群大夫而立其左右遂殺
三郤

無妄

戴璧秉珪請命于河周公作誓冲人
瘳愈

初成王少時病周公乃自揃其蚤
沈之河以祝於神曰王少未有識
奸神命者乃旦也王病有瘳見史記

大畜

鳥升鵠舉照臨東海尤降庭堅為陶
叔後封圻英六履祿綏厚

尤降庭堅皆顓頊之後即舜舉八
愷之列

頤

危坐至暮請求不得膏澤不降政戾
民忒

無註

大過

宜昌娶婦東家歌舞燕樂有序長樂

嘉喜

無註

坎

鑿井求玉非卞和寶名困身辱勞無所得

楚卞和得玉獻懷王王以爲欺刖其一足懷王死子平王立和復獻之王又以爲欺刖其一足平王死子荆王立和復獻之恐復見害乃抱其璞而哭晝夜不止涕盡續之以血荆王遣問之於是和隨使獻玉王使剖之中果得玉

離

鵠思其雄欲隨鳳東順理羽翼出次
須日中留北邑復反其室

無註

咸

早霜晚雪傷害禾麥損功弃力飢無
所食

無註

恒

蝙蝠生子深目黑醜雖飾相就衆人
莫取

蝙蝠即蝙蝠也又名仙鼠又名眼
翼

遯

去如飛鴻避凶直東遂得全脫與福
相逢

無註

大壯

婚姻合配同枕共牢以降嘉休子孫
封侯

無註

晉

咸陽辰巳長安戌亥丘陵生止非魚
鱸市不可諱阻終无悔咎

無註

明夷

螟虫爲賊害我五穀簞食空虛家無
所食

螟食苗心者害苗之虫也

家人

謀恩拜德東歸吾國慷慨歡笑歡樂
有福

無註

睽

齋貝贖狸不聽我辭繫於虎鬚牽不
得來

無註

蹇

比目附翼歡樂相得行止集周終不
離忒

比目魚也附翼比翼鳥也

解

一指食肉口無所得染其鼎鼐舌饒
於腹

左傳鄭公解鼈召子公而弗與子
公怒染指於鼎嘗之而出

損

曳綸江海釣挂魴鯉王孫利德以鄉食
仲友